

四庫全書

集部

欽定四庫全書

集部

濟南集卷二

詳校官庶吉士臣汪彥博

侍讀臣孫球覆勘

謄錄監生臣俞光豫
謄錄監生臣龍舜耕

欽定四庫全書

集部三

提要

濟南集八卷

別集類二 宋

臣等謹案濟南集八卷宋李廌撰廌有德隅齋畫品已著錄文獻通考載廌濟南集二十卷而當時又名曰月巖集周紫芝太倉稊米集有書月巖集後一篇稱滑臺劉德秀借本於妙香寮始得見之惟文粹中載遺文一卷

而已永樂大典修於明初其時原集尚存所
收頗夥採掇編輯十尚得其四五蓋亦僅而
得存矣廌才氣洋溢其文章條暢曲折辯而
中理大畧與蘇軾相近故軾稱其筆墨濶翻
有飛沙走石之勢李之儀稱其如大川東注
晝夜不息不至於海不止周紫芝亦云自非
豪邁英傑之氣過人十倍其發為文詞何以
痛快若是蓋其兀界奔放誠所謂不羈之才

馳驟於秦觀張耒之間未遽步其後塵也史
又稱喜論古今治亂嘗上忠諫書忠厚論又
兵鑒二萬言今所存兵法奇正將才將心諸
篇蓋即所上兵鑒中之數首其議論奇偉尤
多可取固與局促轅下者異焉案呂本中紫
微詩話極稱廌贈汝州太守詩而今不見此
首又其祭蘇軾文所云皇天后土鑒一生忠
義之心名山大川還萬古英靈之氣者當時

傳誦海內而亦不見其全篇則其詩文之湮
沒者固已不少其存而未佚者固尤足稱矣
乾隆四十六年三月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

欽定四庫全書

濟南集卷一

宋 李廌 撰

四言古詩

月巖齋詩

南山之北北山之南環岡繞嶺紫翠相參
犇騰躡蹠萬里驂騑丘行沃若靈秀所涵
平巒蔽虧餞日西崦月生大東錯落夕嵐
凝輝萬壑澄若淵潭有窶人室架楹維
三其名實佳佳哉月巖窶人者何贊皇之
黔伊誰名之

宗伯子瞻嗟嗟寔人天民之淹昔也方將愚妄所漸喜
功好名虎穴屢探輪殷綏墮却戰猶酣老不及人綿力
弗堪飲冰食蘂處約已甘天匪靳子事有莫兼俾子有
知錫福則廉餘齡數竒展也不占異時著書雖俟桓譚
心勞用寡遠愧周聃今師農圃穠蓁崇艾年登歲樂糠
稗求饜褐寬溫散懷此不貪門子之責責我丁男我居
區中如繭之蠶身外餘地烏用沉潛逝將掃迹於焉養
恬披風遡景玩目嵌巉彼無獻嘲居之不慙

五言古詩

觀出日

蒼崖觀出日依稀自扶桑初如浴咸池蒼蒼或涼涼漸
若賓陽谷赫赫復煌煌海濱升霞彩貫地萬丈長攝提
御天衢一照明萬方不願發五色不必呈九光無用現
重輪無貴珥青黃吾心願吾君盛德如朝陽照臨冒下
土威名燭無疆不復迭而微常進熾而昌蟻行理雖切
九跳比亦狂夫喜壯觀蓬心遂恢張異時環堵宮但

見生東牆

宿峻極中院

晨游開母祠暮抵紫虛谷千峯掛夕陽猶指中寺宿山
空無人聲暝色滿草木亂石礙饑馬荒榛走驚鹿深林
恠禽號絕壑山鬼哭照塗藉流螢呻吟愧僮僕乙夜扣
禪扉孤燈耿幽綠猶疑夢寐中對榻眠空屋

丙子歲三月十有二日遊嵩山宿峻極中院時
天氣清朗山月甚明因以陰壑生虛籟月林散

清影為韻詩各六句

陽崖轉窅窕層林蔽重陰披榛過輿馬緣雲得幽尋坐
覺真境寂茲馬悟賞心

平時崢嶸想跼蹐在城郭言登諸峯勝幽情散寥廓馬
能乘海桴終期老丘壑

日背西嶺沒月嚮東嶺生殷霞未隱彩皓露已舒明斗
柄坐可挹政恐河漢傾

微雲起前礎出山忽紆餘風吹去何之閑意滿太虛倚

柱聊目送我生何滯愚

塵居倦喧卑區中憎陜隘游目宇宙間山河真礪帶一
嘯萬林端呼風作天籟

風回荔蘿香意與塵氣別杳杳雲際鍾皎皎松上月觸
焉感幽處蟄戾明發

陰磴頑雪積老崖白雲深捫蘿陟鳥道揚塵落喬林下
方有栗場俯見歸飛禽

舍鞅陟層巘老步獨多歎笑談谷傳響松聲遞蕭散欲

尋草堂池土室無僧贊

松風憇俗駕撫心愧營營登臨念勝土烏用千載名願
與婦子俱終焉住神清

穿雲上虛無彷彿凌倒景微茫鴻鵠背指點衆山頂出
日上扶桑徘徊萬林影

西郊

黃花作秋色槁英作秋聲殘春有秋意奈此惻惻情喬
木點新翠古壠集飄英午風薰徑草麥浪搖新晴脂車

逐勝士訪友來西垌苦汗泣瘦馬流塵汙華纓輾然發
孤笑屢醉輒屢醒聊歌干旄篇愧我未登瀛

觀文恪王公樂道院巽亭在城上下臨湫水

氤氲蟠巽隅崢嶸干斗魁蕪城佳氣緬茂林朱檻開竹
月靜蔭局松風綠搖盃開軒清流度隱几遙山來恪公
昔優游弭節此裴回言念平生容鬪然九泉哀張老頌
趙寢雍門悲孟臺歌榭奄凝塵燕閣鬱生苔侈靡一轉
盼金碧復成埃獨無不忘者安用爾為哉恪公古遺直

勁氣騰九垓豈惟甘棠愛

公嘗守許

將與故國偕傳家有元

凱上客盡鄒枚聊興勝士想愧無能賦才

釣渚詩

釣渚平過水筆溪清見底寒煙曉冥冥白石明齒齒目
送歸鴻飛游心志鱸鮓手應心不疑物我相諾唯黃雀
漫多驚白鷗來自喜之子未投竿我來頻洗耳

盧巖

徵君邈已遠舊隱鎖雲扃欲知敬遺德巖以姓為名永

言配此山千歲為德星雖無猿鶴在空餘泉石清想昔
居此地笑傲輕冠纓入居伯夷室出効子真耕種德如
古人養育達周京惟能抱永正是豈其用卿

黃楊林詩

黃楊性堅貞枝葉亦剛愿三十六旬久增生但方寸今
何成修林左右映煙蔓良材豈一二所期先愈鈍

臨溪檜

青青弱草陰猶能蔭寒魚况乃蔥蒨色百尺映扶疎月

烟含清曠水氣相吹噓忽思大明宮垂楊拂丹渠豈無
蒼翠色飄飄映茅廬日暮生幽寒寂寞意何如

天封觀將軍柏

衛懿恃昌富乘軒鶴有祿貴鶴賤用民身殘國顛覆楚
子惜名馬終焉葬人腹爵封東山松侯比渭川竹時輕
官秩紊辟妄作威福無益害有益褒賞逮禽畜所美非
美然恩澤及草木或譏將軍柏無乃狃此俗曷膺千鍾
養曷被三品服不為朝廷力竊號委空谷余知將軍心

非悅世人目千年抱貞操勁節無屈曲不為歲寒凋守
此萬仞綠天武累此名冥不知寵辱雖不助柏敬豈意
慕軫轂吾儕之小人悟主惟欲速盜功仍苟容豈恥無
道穀潭潭居紫府沉沉據華屋貪恩謀子孫占俸及僮
僕膏肓病天下天下思食肉朝為四輔重莫作三危逐
笙簫金谷宴翠柳北邙哭尚方屬鏤賜朝服東市戮君
看古功臣牖下死為祝將軍如有心應笑世愈感拔萃
真不羣虛名豈其欲胡不觀其旁滿山皆樸檉

鳳凰臺

舜韶奏九成鳳凰故來儀漢徹方秦政何乃悞至斯爾
非鷄與鶩出處當慎時

送霍子侔還都

真人造區夏民瘼僊以蘇戎衣振不格力舉覆地盪桓
桓神武威自信人未孚當年羣嘯聚劒立猶稱孤天旋
地機轉曠谷吹埴竽瞳瞳東方日揚光扶桑隅文明燭
無疆煌煌中天衢曾孫太平君稽古追唐虞求賢用吉

士隱淪來真儒股肱協帝躬腹心懷良圖庶事正絜矩
嘉言經典謨欲將醍醐酪沾濯瘍垢膚又慮天下事學
古太殊塗衆說折聖經丹青久將渝世稱淵華者春秋
華實敷攷之篤誠謹熒熠皆穿窬况復口耳學摘埴冥
索途終身不知道死矣如螻蛄無心時雨化蠲逖狂狷
迂法言立定論章章如璫瑜專經務篤實使士知所趨
欲皆抱道義如孔丘之徒士各重良貴豈若乘風亮亦
有倔彊輩索足行深涂如經風過耳不美七尺軀斯人

雖云存衆昧不容誅振振文風聲得與帝載俱先生住
毗陵才望振國都時方尚雕蟲如紫色奪朱獨專性命
學已與衆欲殊窮年志專一立節如仲舒幾年困禮闈
輿議久已需錦衾爛絺帷羈絆縻於菟滿衣京洛塵馬
病僕亦痛前年彤庭下射策闕彫弧如何扛鼎力不勝
舉匹雛官卑府參軍知命安嗚呼青雲有伯樂俯識千
里駒鋒斷吹毛羽氣節凌轡轡究之性天遺溟海不可
斟遂言黼座前此材誠楠枿方今構大廈不可同朽株

嘉言沃宸衷頓首帝曰俞汝其姑試之育士師東吳東
州士氣懦勁草惟蓬萋循循教不倦啟發親持扶義方
達遠邇來學皆犇驅瑞鳳止美竹飛翔鳴高梧賢哉師
道尊丘軻居魯邾巍巍數仞牆深邃不可踰宗廟百官
富不見空踈踴三年就傳訓弦誦惟歌歛或謂我自然
孰知如蒲盧濟濟榛桔茂皇州忽云徂士民惜其去夾
轂爭挽輶老叟遮道留寶篋携漿壺謂言感恩惠成我
妻與孥去矣不忍還望塵猶懽呼嘗聞有美玉不琢隣

砥礪美質逢利器欲切惟錕鏐子時才力薄治邑民歡
娛季路在大國止可治轉輸古有孟公綽知宏才有餘
優于趙魏老不可為大夫皇皇魯聖人道因將乘桴才
單敢兼人道蹇罹置寧先生天與才貫溟包五湖昔否
今已亨天扉有携掄行行近清秘召見延英廬一言悟
明主欽哉帝云吁朕方在賴邸鄉譽時已憮何其數年
間下國猶劬劬朕意在教育如芑生新畝往惟教東邦
朝野多美譽往矣勤勿怠潔白相連茹或然何其嘉宿

憤得以攄上苟膺寵光不日昇朝裾待詔金鑾殿著書
文石渠不見賴陰叟拖紳晉金魚河湟少年將五載登
台樞

鹿門寺

蓬萊鹿門道莽莽漢津渡川塗兩緬邈今古同此路德
公厭州里翁媼是中去風流可引想千載豹隱霧浩然
遶城歸羸馬琢妙句宿草被荒丘寒榛軼驚兔昔我懷
登臨歲晏屬凝沍茲遊愜于願春仲忽云暮杖策升翠

麓喟歎憐老步冠雲得危亭臨世濯凡趣蒿薺俯青林
繡繪辨紅樹他山照寸碧迂江泣晞露我生老憂患胃
次貯百慮寓目宇宙間猛省忘外慕前瞻萬松嶺翠壁
屹相顧輕颺觸纖柯虛籟森已度覽道繞危巔爽氣襲
籃輿傳聞古道場臺殿若鱗布日者一昔灾楹棟皆若
炬壞垣積煨燼况乃金碧處山僧勤樸斲堂構畧已具
童奴一萬指役作供指呼當有鬼運牒變現助持護蹇
予藏史後道骨天所付一為功名想悞落塵土污華顛

髮先縞鰲面顏色故惟有炯炯心從昔常自悟會當借
巖谷投老寄冠屨吹雲飯青精煮石羹白芋神遊八極
表諷誦大人賦鵬鵬或圖南為予閭風御

四逸臺

異時常獨飲對月成三人已喜三士遊况遇金城辛洧
淵俯龍室廢臺干白雲委徑已就荒九仞將遂湮飄然如
四鶴躡屐披荆榛北岡翻波濤南岫列嶙峋登臺與佳
名大筆書蒼珉占此泉石清坐使草木春諸公廊廟材

我期茲隱淪

關侯廟

三方各虎踞猛將皆成羣屹然萬人敵惟髯稱絕倫仗
節氣蓋世橫稍勇冠軍艱難戎馬間感慨竹帛勛鳳閣
控蠻楚廟食漢江濱神遊舊戰地庭樹起黃雲

白馬寺詩

淚漫漢江臯迤邐楚山岫衡門掩半麓飛甍聳層構高
林敞華榱雙泉逗瑤甃龜魚水中坻牛馬飲殘溜我卜

闕外居此計春可就參差菱荇香猗儺參朮秀行吟池
上篇來倒壺中酌

墨池

臨池苦學書池水為變色終朝坐忘疲拚卷每自得滋靈
蚌孕貴飫餌魚腹溢回堂映茂草玄源漱白石祗恐驪
龍飛蜿蜒上丹極

伍子胥廟

烈士可廟食么麼可悲夫誓心報荊郢忍恥適江吳功

成期牖下旋聞賜屬鏤楚邦乃怨耦宿憤嚮已攄濤江
厭波神魂魄遊故都存亡兩陳迹無用愧包胥

題廟

築巖傳胥靡耕野華老農儵來坐廟堂談笑樹奇功卯
金運徂謝孔明隱隆中誰言一丘壑卧此天矯龍古來
王佐才中間千載空之人輔玄德真有宰相風惜哉小
用之功烈不復東嚮非三顧重白首田舍翁

華巖庵

人生與區中猶如繭中蠶欲窮無然心足力有不堪終
南有五虎銜牙坐耽耽乃有忘軀人臨穴已擬探干將
古寶劍吹毛可揮錘亦有躁戾者執刃求其鐔所得計
所傷胆潰心憂悵况夫愛見魔悅如芻豢甘大士獨了
然白月沉珠潭獨造無僮僕妙理去二三至哉天下樂
端默坐草庵

岑使君牧襄陽受代還朝某同趙德麟謝公定
潘仲寶皆餞於八疊驛酒中以西王母所謂山

川悠遠白雲自出相期不老尚能復來各人分
四字為韻以送之某分得相期不老

使臣撫南夏萬夫久以望道粹韻宇勝德滿聲譽香炳
然龍虎文塚此金玉相笑談府中居無為民自康

我生世寡與所幸賢者知徽中山川意賞音有鍾期荆
楚非我里從公甘棲遲今茲復舍去何以紓吾悲

閭閻無居人傾城餞賢守擁車不得前遮拜奉卮酒民
言荷恩勤拊育踰父母公不鄙我邦端能再來不

公如照乘珠居朝作賢寶公如三秀芝後天錫難老聿
歸供奉班漆簡探幽討懸應念儉父滄洲濯蘋藻

劉表廟

入自東郭門言拜景升墓墓樹半枯槎冥冥立晨霧鼎
國昔未分蕭牆梗天步呼蒼復何用龍卧獨不顧紆餘
檀溪水黯慘蔡州路登樓欲遣憂君看仲宣賦

故諫議大夫鮮于公欲作新堂以傳世譜名曰

卓絕

唐人鮮于世譜有卓絕之語故云

內相先生題其名曰蜀

鮮于氏卓絕之堂某以此八字為韻作八詩蓋
鮮于公頃嘗俾某賦之而三子以求其詩故原
其古而美其今以頌美之

商朝有仁人為奴恥榮祿九疇傳帝秘八教清瀛俗苗
裔散諸華慶澤鍾左蜀崢嶸多望人冠冕稱盛族

左蜀富山水錦屏秀而鮮卿雲常氤氲佳氣所盤旋蘊
此天地靈並生文武賢稱忠著甲令節制控兩川

天地西設險劒外分野殊君家萬里侯支郡許專誅威

名聲華夷玉帛走易于韡韡常棣華煌煌駟馬車

功高翊戴重錫土仍命氏蟬冕舊傳家龍袞式增賁誰
云五世澤久襲萬鍾貴非惟賴先慶奕葉藝忠義

隱居嗣徽猷超世得古學行藏合用舍聞見守約卓清
風激頽波精義興後覺天子不得臣鴻飛復何邈

先生王佐材蚤歲常數竒平生經綸志白首初逢時經
營此堂久乞身竚歸期堂成不及登魂氣今何之

諸孤皆妙稟况乃承義方世濟商人美各是萬夫望拳

拳奉先志誅茆建崇堂豈徒輪奐美卓絕當未央

吾觀孔父鼎知有名世哲英英大諫公克世嗣前烈
翔金鑾坡白首貫忠節後昆有斯人譜系愈卓絕

趙昭赴成都府廣都縣尉以送君南浦傷如之
何為韻送之作八首

吾生常羈旅送客情更重嗟哉平生交今復萬里送愁
端寓心目往感接魂夢窮途獨栖遲直道竟何用

山河接巴徼關塞斷秦雲誰為萬里侯節制錦江瀆疆

項母狗指曲鈎難致君勿因朝廷遠俯首俗吏羣

昔余旅長洲寄傲碧江潭十年客風埃留滯困周南
冉冉老將至兀兀漫窮探故人各變化漂零空自慙

之子才如冰不應常負弩勿為為貧謀一意在阿堵
廣都綺縠地當念珠還浦惟廉可立身勿使嗟供虜

蜀人以東

人為虜
貨而歸

翔風走塵沙草樹正玄黃煙昏路漫漫日冷雲蒼蒼
杜公作詩處武侯近戰場陳迹勿驚心俯仰已堪傷

蜀都蘊奇氣古今生英儒歌童選何武狗監獻相如煌煌直金馬藹藹侍玉除歸入芸香閣無廢五車書

傾城愛勁竹古士惟徽之而我獨愛君不見即相思今矧萬里游動為三歲期索居念金蘭惘然傷別離

蜀山如鳥道劒閣鬱嵯峨嗟君正朱顏奈此艱險何秋雨峨眉道春風濯錦波青山一羸馬古今應更多

秋日雜興

悠悠東郭道莽莽四海志晨光晞高林泣露泣征轡巨

防楊潒漪哀泉赴橫衛我生窘羈束感數撫消髀

青青陌上草秋徂故應省疾風試飄葉寒露猶湛潁冰
霜來無時爾命詎堅永滋蕃奈爾何咄咄臨此景

昔喜馬少游我馬仍款段古云末路難百里九十半與
爾皆調饑欲速輒愈緩長鳴徒勞爾終愧簫雲汗

黍稷競登場荏苒復滿疇我羹雖不糝逢年亦解憂太
平豈無象樂歲觀有秋敢期飽糠覈役車何當休

鉅黍亘廣隰整整萬戈矛旌旄亂風葉森森疑戰秋如

聞高奴塞將軍用世侯勝筭應在目願解西顧憂

范德孺之

延塞

芡珠乃邊實鷄首真溪毛芥羽復丹幘凌波競將號蒼
啄勝玄蚝百琲轉含桃驪頷有照乘海夫得應勞

搖搖平岡雪芬薌薔花白繁英未脫鄂銳實已潛黑速
哉不踰時幾何天地力寒耕暑方耘古人勤宿麥

橫烟下平林閑雲依裘嶺寓想高鴻背游目凌倒景吁
嗟老子行末路未遑騁晚歲竟如何三數心耿耿

汝華巖

秀法華居之夜
夜聞山鬼打更

道人居此巖誦經歲云久鬼神夜護持空巖擊刁斗吁
嗟已成塵藤蘿穿石牖

與鄒浩志完會於王希聖家因話毗陵事是夕
輒夢還松陵因述夢呈志完

客夢還松陵寒江渺煙雨異時醉吟地依然記洲渚三
高平生歡彷彿遞賓主十年扁舟興一夕暫容與此樂
曾未央覆瓿俄驚鼠隙月鑑我惟破窗風自語展轉誰

晤言僮隸聊爾汝吾生獨何事寤寐仍羈旅

送杭州使君蘇內相先生某用先生舊詩方丈
仙人出渺茫高情猶愛水雲鄉為韻作古詩十

四首

至人本無我與世初無方彊從金鑾游聊用示行藏忠
清秉全德日月可爭光振衣千載上臨世濯滄浪

至人孰可測跨世富英量千齡邁治運萬古真遐想三
台接布武萬乘拱函丈辭榮明光殿乞身青天上

世人期公淺云是真謫仙願公老台鼎白首冠貂蟬為之乃固有弗為愈知賢清風不可挹高高薄雲天

紛紛競干祿汨汨第謀身先生獨任重憂道仍憂民精誠貫白日孤忠橫北辰求之千載上古亦鮮若人

平生史鮑直往歲展禽黜青衫竄長沙華鬢謁宣室重光照八極命世真賢出奈何江湖去獨為蒼生卹

道德富瀛海百谷輸浩渺雲夢吞什伯坐暎黃陂小斯文再炳蔚精義凌縹緲典謨追灝噩協氣充四表

周公非汲汲仲尼豈皇皇吾道無若人孰能相維綱古
今異倫軌英風自相望下民今喁喁造物太茫茫

造物雖茫茫至人自囂囂雖稽具瞻意欲全千仞高富
貴一敝屣功名兩鴻毛獨知退為樂可憐夸者勞

公去吾道辱公來吾道榮生民繫休戚國勢隨重輕先
生如九鼎坐折姦宄萌天如欲平治用舍若為情

先生如著龜萬事可告猶勲業輕黃屋得賢方解憂念
昔彙征日民瘼庶有瘳莫賦歸去來衮衣或能留

吳越控島夷東南一都會
淫風舊倡靡懦俗無慷慨除
弊在躬行報政可立待類非俗吏能千齡樹遺愛

邇臣均勞逸方面乃毗倚
細人怙權寵補外習為恥餘
杭股肱郡湖山真信美意雅如望之肯効倪若水

小人雖嗜學歲月空屢勤
同門盡鴛鴦登瀛校書芸嗟
余老西河索居久離羣從龍
從上下愧彼油油雲

四海李元禮龍門多俊良
英英郭有道一揖遂生光
畫鷁凌雲波仙舟水雲鄉
此心徒皦皦千里共蒼蒼

雨中宿超化寺

暴雨如建瓴龍淵俄怒流逸哉我三士冒雨探竒幽古
寺浮積壤危若萍與漚抱憂窮樂事斗酒聊重留

遊超化寺

常笑博望侯老死窮河源河源幾萬里天派垂崑崙支
流播九逆砥柱䟽三門行穿九地折怒溢千里奔樂彼
洧水源近且具茨根寒泉發清池藻鑑撓不渾引為疏
璃陂碧波媚蘋蘩逶迤入王城順下德可溫全此上善

性利用豈無恩下有萬艘濟旁列千夫屯持此安且靜
用鑑暴與昏頃年時聞龍淵室今應存秉蘭俗何陋濟
輿惠亦煩誰知千載後佛宮枕溪濱喬木上參天綠竹
盈短垣曾此埒金谷神龍依祇園物理自古今興廢復
何言聊思鄭國僑殊勝漢張騫

木文真人章聖朝合州進到其事甚怪至京其
木中人呼萬歲者三詔賜崇福宮

犀視月通角蟬想九目八果羸祝螟蠕天風化陰鵩物

變知品殊尚可易形質真人友造化故與物為一持此
誠與神可貫金與石何為輒入木厭世未肯出衣冠儼如生
隱若陸顧筆非同木居士聲俗競穰祓又非羅公遠戲
隱逞幻術疑是青羊老合江聊示迹薄游附驛車靈宮
居二室

西丘

西丘對秋風蕭颯如原隰木落景扶疎碧環天壁立餘
霞拂暮散夕鳥寒更急獨有松上鶴不為鸚鵡粒

鴈葺介堂元聿作詩某次韻

吾生一漂梗觸焉泊東周十年歎流滯吞默垂遠猷胸
中猶汪陂萬頃蟠一甌興羽欺鎡金寸木傲岑樓圖南
平生志腐鼠詎能留寸心徒自憊雙鬢蜨先秋物理有
否泰奚為久休囚尚愛東方朔處汙能若浮悲鳴非不切
歲月老驂騑莫笑掃一室吾心若虛舟會當掃天下歸
老卧滄洲

百葉梅

寒香本已清真色初既好誰私化工力增綴愈妍巧繁
葩貯春意幽姿照青昊獨無和羹實終應愧其表

夫人城

庸將昧竒正乘鄣罕書勛我登夫人城想見畚鍤勤攻
瑕既遇堅坐制烏合羣異時古烈婦鮮以智勇聞褒稱
勵愚懦敢諷賢令君作傳續烈女遼紹子政文壁間畫
葆羽俾如娘子軍

次和荅張閨寄靈壽杖

我生職貧病壯齡俄早衰朱顏不少貸白髮太先期故人獨閔余遠寄靈壽枝老景知有賴醒醉為扶持

憶吾廬

繆挾經世策蚤衰甘湮淪吾廬有佳趣一廛良可親茂林修竹地青山白雲人塵埃付捷徑風波委要津吾心如鰈日外物任浮雲久厭牛馬走欲令鷗鷺馴歲月既荏苒功名定因循執鞭吾弗能得乘豈所欣畎畝樂可必糟糠奚用勤泥龜喜曳尾生芻恥屢陳束濕雖有術

末路復誰因願為海底泥肯羨山上塵

谷隱飲中以采菱渡頭風起策杖村西日斜為
韻探得采頭二字

東西南北人志向各有在一言契所適糾纏胡可解英英
坐上客聲聞著寰海婆婆諸侯邦未去亮天緯顧余寸
有長葑菲誤見采山空佛宮冷秉燭集飛蓋笑歌觸松
風出谷作天籟後夜風雨時惟應鬼神會

山川納商氣凜凜天地秋草木將玄黃詎肯烏我頭蚤

歲謬懷璧轆轤欲周富貴來無期舍鞅息林丘復棄
農圃業為茲山水游來尋彌天釋軟語忘百憂夜傾雙
玉壺禪誼互相酬試澆硯磊曾洗我千斛愁

會居易齋分韻

君子何樂胥清夜以文會篇章各紛拏錦組貫珠貝高
譚生清風石齒漱湍瀨安得樓蘭肉充庖餘炙膾

啓母廟

帝武啓宗周元鳥濬哲商塗山配神禹獨不嗣娥姜異

時天與賢嗣子緊匪良欲肇天與子是用開厥祥鈞臺
享羣后有扈誅叛方誰令謳與訟帝畀有夏昌推此方
朱均巍巍真令王伯陽指株李阿衡降空桑龍踞生漢
祖龍璫誕褒娼石裂何足問世語多荒唐若比望夫山
雖怪猶有光

筆溪

張生古狂夫草聖稱豪邁縱橫意有得野馬御風快醉
醒忽驚神自以不可再乃知高世能至理適有在況夫

窮年華朝夕精揀汰期茲筆溪水色變崑崙派

施栢花

佳花香藹藹老栢意蕭蕭如何蒼翠質許附繁柔條仙人踏錦障視步武夷橋願託歲寒心凌虛上煙霄

偃栢

名園氣虛闊怪栢獨凝偃高枝翳浮雲翻然志飄遠赤松來何遲黃鶴去未返蘇武遊虜庭矜傲何蹇蹇朔風吹寒枝日暮羊在坂乃疑高堅材獨得造化本蕭蕭古池

上不與凡木混

霹靂琴

老桐初無異憔悴輩散木良材固自信終歲委空谷孤
根聽霜霰厥命寄樵牧雖云具宮徵誰意望琴筑天公
憐冤憤霹靂驅怪伏蛟龍出蒼幹電火燃裂腹造物一
愍弔為惠在反覆神馳變廢物瞻賞改舊目裂為君子
琴日奏太古曲因知物興廢尚爾轉禍福志士抱孤操
來者悅未卜壯年昧籌筭奚用定榮辱

欽定四庫全書

濟南集卷二

宋 李廌 撰

五言古詩

同德麟諸公觀秋風閣自賦詩臺乘月汎江

虛閣凌縹緲危臺俯澹漫憑檻眺落景倚柱送歸翰空
濛暝色合懽恍天宇寬皎皎明月上炯炯青林端寂歷
四郊靜陰森清夜闌秉燭下草岸迴船遵柳灘繁星粲
湛彩白煙隱微瀾夷猶放瀟溜閣澹數煙巒絺衣涼風

發角巾滋露溥心適醒亦狂樂極清更歡叩舷過龍室
抵掌驚水官仍思藝犀炬下欲窺蛟盤風雲襲毛髮冰
雪澡肺肝慨歎念前哲興懷成壯觀寒子棄叨畝放意
遠遊般合鞅昔徂歲維舟今戒寒佩服良友義論言畏
塗難茲遊興不淺冒險夜未安風波彼何懼忠信邪能
奸

又九月十四日登秋風閣以餘霞散成綺澄江
靜如練為韻分得餘靜二字

繆蹈江海迹吾生靡懷居役車窘陰雨蒸腐敗衣衲晨
昏雷聲中我懷何時舒秋陽出頑雲杲杲照我裾言登
秋風閣乘興安可徐猗紆下銅鞮縹緲凌紫虛錦葉眩
林表金色垂霜餘棲苴寄榛莽潦痕在菰蒲我遊獲所
適況乃弗為魚放意宇宙間所至皆吾廬

山客水不覲烝雲日如甌陵陸混泥沙黯慘度朝暝晨
霞送晴色喜見天面瑩江光劒歸匣雲收四山靜高閣
眺空無復見前日勝回思困塗潦懔恍如昔病登臨勿

太息秋風漸熒勁

搗帛石

嫠女織玄綃欲作六銖衣
空山搗寒月傳聲徹雲闥
可笑綺縠女不識砧與機

同德麟仲寶過謝公定酌酒賞菊以悲哉秋之
為氣蕭瑟八字探韻各賦二詩仍復相次八韻
某分得哉蕭二字

楚女唱桃葉楚巫歌竹枝
壯士撫長鋏語闌亦興悲
君

看拱把松中有千歲姿
薜華不及夕柯葉漫成籬

歲隤晚秋菊芬菲忽齊開
緣堦上古壘粲若黃金臺
搔首念霜髮擷英泛羽盃
顏齡恐能制壽侯安在哉

白髮諳冷暖蒼皮貯陽秋
中年已如此一飽更何求
把菊悼飛葉微行遵遠流
此非柴桑里乃有淵明儔

痛飲可一石寧辭手中卮
挹斗自斟酌澆胃定為宜
心如虎在園事若羊觸籬
執鞭吾弗能放意從所之

青松多陳根女桑漫柔枝
虛心任寒暑寧與鐵炭期
古

酒有妙致青山多令姿醉遊卧丘壑於予復何為

松菊徑勿荒政欲善鋤治參商管蒯中高韻自超異區
別雖少勤寶此吾臭味勿言大鈞中與彼同一氣

霜風隕高木零落臨艾蕭幽芳枝孤秀華心慰無聊堂
中老元亮日賦歸去謠杖屨樂三徑為爾甘折腰

風騷本無作強為憂患出菊荒思卧陶江渾歎沉屈吾
觀思王詩復若清廟瑟斯文幸未墜且進盃中物

神松嶺即岳神為珪禪師一夕自北嶺移者

初聞百梁村拔自天池井今知萬松岡一夕趨北嶺顧
茲挾山威何心罔知警

二士避雨巖

遇險思共濟胡粵無異心而我與夫子義烈真斷金陰
崖避飛雨羣龍方怒吟巖中歌式微相和相知音

送元聖庾縣丞之官泉南

漫郎老倚玗紫芝于蒔于二元皆國器位卑德有餘嗟
公有祖德官况復不如平生志引大英爽凌太虛胷中

有武庫羅列千卷書攘臂班馬間豈但突黃初謂宜在
妙齡持橐承明廬何為沉下僚蹭蹬青雲途三調南曹
選雪霜稍侵鬚又佩墨綬去不得黃紙除憐公批勅手
乃判稅與租閱世悟休戚勝負如梟盧達人自通脫於
何較錙銖平治不平氣俛仰自走趨剛忍素所遇時乃
烈丈夫南安極南粵控帶荆與吳南涯即滄海北渡竟
重湖回首望嵩潁邈焉天一隅南州例卑濕海錯富蟲
魚作客萬里外善保千金軀加餐慎興寢三年賦歸歟

故園有老伴林下要為娛

德麟約游西山某自鄮來會行李阻脩成此詩
初無聲利想獨有山水癖慨然歲月逝名山喜投跡書
來拜嘉招吹火自蠟屐戒期西山邑奔命通書尺君詩
如齊楚凜凜兩大國吾詩比邾滕惴惴甘服役千里奉
詩盟敢愛股肱力方舟絕清漢舍棹上層壁梅堦排青
雲四覽衆山脊僮肩困負笈馬喙不停息跼足上崔嵬
欲進輒已植喘喉如鼓橐開闔振胷臆仰愧升木猿俯

羨歸飛翼天曛未敢止行行望仙舄

見山岡詩

高岡勝虛閣晚景澄寥廓遙潢浸廣野危峰柱碧落雲
過半山陰蟬聲夕陽薄勤勤學飛仙海上尋黃鶴

三醉石詩

伊昔三逸人醉卧捫白雲其間歐醉翁翊戴建殊勛山
靈豈羨爾應復勒移文

中隱菴和趙孺韻

退之以文鳴師友得侯喜聲名力與俱雖尊未勇耳黃
池距青山孰辨都與鄙菴成誰振之句出閨如市千仞
寧我高充實信吾美坐令菴內人前車云可軌禮樂有
先後後進則君子執方而昧圓俱野那復史伐柯固執
柯疇克求諸邇蒸之既匪薪采焉又非芑近交韓與侯
步驟亦常耻一醫消息盡布毛自何起要須六月息不
息不為已敢問二詩人如何得意旨

答周行已相贈行已端慎太學諸生忌之

佳人寓雲端，餌霞服靈烟。舉手謝時人，信爾非我緣。誰
令山中瓢，酌此闌闌泉。捨爾芝蘭薌，一染漸餘羶。鉉黃
強為容，孰竟謂子妍。眷焉反初素，此道自古然。

習家池詩

言登峴椒亭，南望高陽池。習君漢徹侯，種魚千石陂。川
光涵翠阜，倒影媚清漪。伊昔典午世，山公已游嬉。子孫
安在哉，獨樂寧可期。蕭蕭宰上木，長風蕩餘悲。

習鑿齒宅

習侯有世德冠冕襲鷄鶩喬孫富六藝鑿齒四海知蘇
嶺陟家山高陽浮故池著書山水間秀發胷中奇間從
彌天釋善戲間庾辭尚友雖異代斯人可夙期

龐德公宅詩

荆山雲蒼蒼漢水波瀾瀾山川意高澹宜有隱君子德
公卧鹿門老不踐州里潔身遠憂患豈復存愠喜藐然
姑射人胡為市門倚諸郎有鳳雛輒與卧龍起

過具茨諸山始達嵩少

初踰千峰時千峰各呈秀抵茲嵩高前始覺衆山陋恃
此一柱力天地敢分割四維既張弛穹壤託高厚卿雲
冪上國秀色連楚藪衆峰無聳峭配此真培塿固將倍
十百何止吞八九余身一草木乃欲擅去取出類復何
言聊貽澗濱叟

登嵩頂

丈夫有奇氣坐井直鬱鬱竭來古嵩州攜手登太室中
峰到絕頂北嶺太峭壁山河在股掌帶礪何足述星分

九州野塊列七雄場放懷宇宙間想見天地闢下觀雲
雷變慙爾龍鬼役下方萬仞底草樹靄蒙密愈知天下
小助我浩氣直平生四方志登臨聊感激嗟嗟封禪媼
遊豫朝百辟誣辭與慙德可笑乎四嶧廟社尚不閱財
用遑肯恤萬兵樹豐碑數丈壓嵩岑豈知市朝變輦路
蔽荊棘同登八仙壇再題三醉石君無笑余怯登臨常
股慄為寶千金軀夷路猶恐失存我厚蒼生豈効伯昏
逸歸卧聽天雞扶桑觀日出

求志書院詩四首陳師道履常之所居也

癭槁巖下士蹟隱心捷徑汗顏塵中夫謫笑幸游騁賢
哉陳夫子兩不傷厥性潔身風波塗獨若萬鈞錠

辰極不改北滄溟日輸東聖道亦如是昧者自異同哇
鄭迷世習舍魚當取熊著龜期吾子此語聞先翁

君氣久已浩君志復何求同聲久絕和一見忘百憂藜
藿鄙膏粱締綰傲狐裘德輝下可覽安用翔九州

漆開辭未信顏回恃有田為貧仕何媿得已非自賢破

褐坐窮閭聲華飛日邊苦節勿匏瓜仲尼任蒼天

靜齋詩題盛君明之室也

人生乃動物萬事皆動端陰陽造化汝賦汝以五官五
官各治職愈治當愈殘非苦動所擾烏知靜為安非惡
動所戕未貴靜為完百年夜分半夢想仍妄瞞動多靜
常少竟為動所干回光一自照萬事無悲歡居士何早
達動境能反觀寧為玉在璞不為珠在槃虛室生朝白
青瑣凝暮寒聊持動時想攝入靜中看

寶幹山茶

山茶乃凡木寶幹始為奇婉雅瑞荷花扶疎連理枝傾心相爾汝和氣生怡怡清陰亦可愛惡木正離披

上姑丈閭丘通牧少卿

天下一大器安危繫乎傾哲王慎民監措術如和羹辛甘或偏長非可制割烹五味既可口君子嘗曰平方今太平君戒歆如持盈乞言用龜鑑履德均權衡庶民雖蠢愚一或非所營視之如已內涂汚千仞坑是用選賢

德告戒敷至誠曰雖一人良萬邦咸以貞尚賴爾庶牧
裨朕來聰明分符授虎節專政千里城朱車輪兩轡畫
戟門十旌禮文既光華遠煜如杖英良圖沃朕心蠲瘼
求民情如意運手足乃與朕力并朕所戒假樂難慎惟
守成願昭先人功奠枕臨周京羣方政咸乂惟海隅蒼
生魚鹽機巧利涼德多矜爭版圖庶彙徵雉壘侵荒荆
矧乘荐饑後魴鱮尾多頽古既無罪歲此獨何所令明
明普天下孰非聖人氓當求善仁政如解中山醒時公

罷仙班入覲中天閼帝優老成人錫祉昇名卿吏能素
嚴翼公望方崢嶸物賴山愈靜川納海益竝齊安漢中
治政迹如韶莖剛明濟清淨錦組輝瓊瑩果毅將慎智
佩玦鏘璵璫英英衆人師落落天地品是用簡上心僉
議如預盟公辭臣老矣已與世累輕東吳富山水烟霞
氛紫清樂郊適所願逍遙掛塵纓賞延及孫子榮慶并
弟兄智恬欲相養為壽期老彭帝云東州民思濟求令
名室如相忘魚煦沫涔輒泓瘁如旱麓木枯槁需春萌

朕意慎許可當賴王國禎如翮皆飛鳥遴集惟鷦鷯無
辭逆朕意欽哉卿惟行公承帝眷異竭節期有亨郡民
幸其來爭以先見榮實篚攜漿壺馬首拜且迎謂言前
掾曹執禮無私評遠茲三紀歷位重德愈宏下車始授
政季秋未徂正圉圉屢空虛盜止無黥刑康莊夜達旦
戶敞民不驚柔遠戒慢令荒政先緩征榛楮已濟濟莪
蔚將菁菁熙熙春臺樂苾苾太室牲嘗聞至仁化政立
可去兵又聞公明心罰罪能驅鯨古云州縣勞此語非

準程韓侯功固高羞比於絳嬰光初必凶終進銳多反
瞠如徹禮飲酌彊酒奠兕觥雖云快壯心泰至多醜營
孰知安行健履坦非掀橫圭璋賤珉玼山川貴剛駢良
弓豈苟飾利用關以彌斯為古循吏業廣惟勵精孤生
何所懼自幼憂患縈遭家屢不造省始離呱嗆邇復遠
所恃羈迹如漂萍操心但書危固戶賴巧黠曲蒙惠私
重哀愚斯獨婢字撫得不違俾就三龍賢曰余欲玉汝
誰何恡金籛愚非苟恩者銳志思迅鏗為修不敢殆希

彼農夫耕勲勲慮冠至豫蓄終歲盛戰戰與心競中林
亦丁丁淵崖視鳥道履冰越深瀛剛克素自許竊亦輕
申張永言念眷勲願以堅白鳴作詩謂云何姑以紀頌
聲

曉發鄧城和德麟韻

遙岑掣殘電炫轉雲篩碎長庚送曉色瀕洞初見地饑
馬戀櫪鳴唳牛繫林睡橫塘寸魚跳魚跳石雙翠敢嗟
衣化塵且喜風泛袂蚤懷功名心經濟豈無意老軀既

骭髀柔態漸斌媚棹舟江南去白酒謀日醉絲尊茗雪
鱸欲飽三尺喙半生客荊州兩渡北津水尚友有若人
獲我心所契行李念淹留感此秋蟬嘒掃除向來想漁
釣真得計塞翁已無心得失無欣喟

鄧城道中懷舊時德麟相拉至江北三縣

昔從郡丞游餘寒春未迴玄雲蔽冷日朔風捲黃霾枯
榛擁殘雪疎籬橫野梅季夏方溽暑後乘復與偕青秧
舞白水赤日飛紅埃牛馬喝俱喘蜩蟬嘒相哀值此寒

暑變感予羈旅懷行行江湖去舉櫂向天台老婦膾魴
鯉丁男滌尊壘霜橙薦紫蟹水藕浮瓊醅念公復行縣
秋光當獨來予時定相望持酒上高臺

石經殿

漆書寘蘭臺筆削猶敢擅真名鏤遺編定知伯喈篆未
校芸閣書成此石經殿

天門泉詩

俗名救命
泉今已涸

昔聞天門泉石竇注澄澈行人口生煙可救萬夫渴為

惠胡不竟吾來值源竭

捨身崖

蛾眉備百姓怨女填六宮捐軀委崖谷隕生因爾容匹婦多白髮婦怨實無終

太華

太華復何如名山控西極忽從天地分屹立三萬尺天維西北傾扶持藉為壁風雷出毫末日月轉兩腋秦川散餘秀長空借殘碧支離別周甸指掌觀禹績因知方

嶽重奚覩介丘憶蒼旻仰猶高厚載真有力

三岡亭在邑西南三十里秦昭王使謁者王稽
使魏夜與范雎言先生待我於三岡亭之南是
也

賤人敢圖柄時哉天步艱相爾簣中意三亭寧覩顏佩
印能幾時網成已入關宣言往代汝天道真可還

東津夜飲送岑穰彥休赴闕

東門何煌煌驪駒絡金羈朱顏照秋鞠炯炯青雲姿往

登芸香閣編書給隄廩子方滯江漢發軔將安之
風林舞危葉霜畦殺青蕢車馬如上州朝天逐高雲行
邁豈不勞欲書竹帛勲歲晏重感慨我獨念離羣

曹華國之子贈詩次韻答之

平生曹華國志意多感慨塵埃迷俯仰翫隣游方外余
嘗賢若人心以古人待食藥甘有味舐蜜遇潛蠶費恨
沒九原長屯竟無秦宿草揜一丘長夜遂千載喜君好
男兒贈語頗剛快弓裘解傳業門戶茲有賴文章第美

身長門不須賣

來詩有賣長門賦之言

邃經堂

男子宜讀書讀書須五車紙腐唇自裂豈為刳心魚
吾子少年時青雲得意初英華發清端賦筆凌相如
自試文石陞竚召承明廬孝隱二十年復與志利疎
軒裳不掛眼鐘鼓悅爰居歸來邃經堂志惟與道俱
架上數萬卷偃仰時卷舒使彼夙昔人微言幸發攄
春洲生蘭茝寒溪脫紅蕖逍遙適所願未可詠歸歟
上方宵旰暇夜

殿誦子虛

伯原曾進
東都賦

送李德載公輔之宣城王子敏適之寧陵秦少

章之仁和

先生位管轄四海在陶鈞顧我門牆士於焉益情親
瞻言給鼎味旨酒侑芳珍粲粲春服成暮春及佳辰
載詠先生道興懷感昔人三子果藝達從政宜牧民
維舟萬里流喜色照通津廌也不速肖農圃老此身
同門各騫翥索居獨離羣諸公廊廟器行當策高勛
念此今日歡

無忘病且貧結駟僮肯顧促車清潁濱

送王仲求

飄風非焚輪觸石生孤雲逍遙王真人行行傲世紛齋
戒斷葷臯日誦浮屠文敝袍遊江海耻與狐貉羣吐納
全真氣鬚髮垂如銀十年臨池學自許登右軍謙謙卑
自牧處約人皆忻扁舟忽云徂欲扳心殷殷丈夫重訣
別兒女徒云云常聞釋氏說精進在慇懃紅塵易汨沒
跋涉憊力筋不如巢華山修煉如老君

送秦少章

建勲各有志而我齒已疎除書喜之子試吏東海隅滿
懷貯忠義陳編陋嚴徐平生困末路龍蠖意不舒定交
青雲表凜凜國士徒執顏肯顧我曾未鄙非夫破愁有
斯人我鄰知不孤危言解補天決折已非圖成名聊爾
爾國器自時須收功從茲始良驥驚修途開樽稍黯突
慚愧飯與芻閑戶待子歸看我所著書

同諸公餞望元因宿谷隱以何當風雨夜復此

對床眠為韻分得對此二字

雨氣天末來暝色江臯起層林蔽樓觀黯淡水雲裏匹
馬何所從翩翩五公子異時天一方相遇忽在此溫言
各慰惜道舊半悲喜熠熠螢度幃泣泣礎流泚他鄉念
羈旅况復錢行李一笑未易闌相望跡千里

秋江冒后土餘潦滿溝澮行人泥沒輶腐黍亂荒蕒結
客山中游風雨在顛沛崢嶸棟宇下磊落宜我輩還同
竹溪逸笑傲盼庭檜繁陰阻杖屨瞠瞠幾弦晦誰能決

頑雲共此明月對

大木山

十洲三神山廣厚蟠地軸不知高幾尋滄溟及其麓游
心如太空視彼何芥粟君家三木山包裹一握足鉅銳
曰竒鋒坳巖云峻谷攝心如虬蟬觀此乃陵陸高庠作
九地何啻戰蠻觸老蘇記木山萬里在右蜀立之置庭
除屹嶻可映屋小大雖相懸真贗此其族因形生彊名
等是千歲木君家裏城野繞郭山抱綠巍然複嶺外自

有真六六

孟浩然故居

盱眙羹不糝肺腑窮雕鐫襄陽妙人物我獨憐浩然禁
中拜天子布衣可逢年一言類觸望明主乃棄捐淒涼
鹿門道舊隱空雲煙漢水不世情猶有槎頭鱖

上山

登山蓋有道迂叟真名論不用在徐行不跌由足穩斯
言可銘佩萬事為節擗推之為躬行天下國家本

從德鄰至鄧城訪魏道輔故居懷道符

孟春屬佳辰駕言從郡丞
蓐食戒徒御篝火事徂征
方舟絕橫漢適彼樊侯城
緬懷昔封君能使晚周興
千齡想風概慨嘆岸與陵
故城若墟落邑屋袖可憑
盤飧勸舉箸幅幅氣拂膺
古寺蔽榛薈破舍餘殘僧
人言魏徵君於焉常曲肱
窶居三十年蔚然以詩鳴
人憂不改樂信哉賢者能
常聞有四友作堂在郊垌
我雖樗櫟材臭味亦其朋
會當從飛蓋清夜一來登

李良相清德碑良相百藥四世孫也天寶中為尉氏令邑人立此碑

旌廉以廉寡樹碑勵貪夫後人墓前躅當令德不孤弟無愧屋漏斯能遠苞苴番禺惟飲水合浦自還珠

阮步兵廟

在縣東南四十里今墓在馬旁置廟祠之今諸阮之裔甚多而竹林猶存

千齡一丘壠誰復記主名苾芴百世祠賢哉阮步兵廟旁故墟里竹林蔽郊坰裔孫仍南北胡能師九原

蔡澤廟

燕人蔡澤相秦宣言往代范雎者墓在邑旁有廟

從橫事捫闔揣摩相抵巇茲為富貴術咄嗟乃自知相
形直誤人俾無百年期遂汝齒肥心廟食飽牲犧

羊叔子廟

緬懷吳晉氏天壤非異宇賢哉羊頭鎮一用惠慈撫高
懷寄山水餘事整軍旅當年峴首歎奄冉隔今古遺民
俎豆之廟貌壓江滸誰令望碑人墮淚若兒女

杜元凱廟

書生昧籌算罕立橫草功征南日耽經帷幄明指蹤胷

中有武庫矧與豎儒同賢哉秉節度不制蜀阿童沈碑
雖好名要是真英雄寥寥萬山路爽氣搖松風

和錢之道

仲尼聖之時豈蔽不恭隘知命識大憂嗣世宅已壞不閱
父母邦遑及為崩賸依仁罕言利執禮不語怪汙漫泥中
輟脂韋速邁邁難乎其有恒取善僅鋪饋苟非言抑揚大
道或幾賣峽有食象蛇常苦螻蟻嘒昭昭神禹功鑿水疏
九派刊隨神明疲新水螭蜃快志士每喪元時靡可究屈

薤草

宿草競春力
階除日青青
何心願滋茂
薤去輒復生
一氣養萬類
蘭茝盡勾萌
何當紉余佩
采采擷芳英

同仲寶風雨中過德麟留宿以夜未央為韻分
得未字并和二公夜央字韻

悲風送寒雨
遙夜俄總至
草木雖戰秋
渠能保柔脆
盃盤照青燈
哦詩久無寐
安能決雲開
坐見參橫未

秋徂風雨多
欲作雪霜迓
况乃地氣偏
寒暑或相借
溫

涼久未定裘葛易無暇慙愧平原君客至列盞竿日為
文字飲短晝繼清夜嗟予寡世偶癡甚已如霸有田未
歸耕無策敢求射耽詩近知味疑從果羸化

敢友天下士轍環之四方適願得所向偶如鐘應霜交
態久未定市道良可傷君看江漢水安流日泱泱

張康節家西軒竹張福夷兄弟求詩

種花鄙弱植種柳惡連陰主人種竹意闔戶見靈襟猗
猗復勁節凜凜况虛心晚歲示貞操清風應好音扶疎

高軒下衆景為蕭森世襲萬戶封奚取千畝林

夜坐

東郭新雨餘日入涼氣佳長風吹天維坐見參斗斜
默羣動息寒螢先秋譁清談互絕倒豈復憂過差

谷隱寺

挈巢江湖去端為山水癖竭來谷隱遊契我賞心適
寒江渺平楚複嶺轉層壁誰與龍象筵一掃狐兔迹
綵雲布樓臺迎日麗金碧堂高磬聲邃壑遠松響激
山光晚

相照空翠濃欲滴行當就墟市幽棲買泉石日詠招隱
詩時過彌天釋

題蔡君謨墨蹟後

古人托一技身死名不滅賢愚置不論筆畫觀可閱嶧
山刻秦銘斯篆屈金鐵雖在衆憎惡恨不頸荐鉞褚令
獨且直還笏首叩血魯公秉忠勤白首抗希烈獨有虞
永興當年稱四絕賢哉蔡莆陽直氣亘南粵入為楓宸
侍遇事挺奇節揮毫霸當年粲然星中月非惟驚代能

乃是名世哲

嘯臺

步兵游方外棄禮真太簡過差生杯酒況復能白眼蘇
門鸞鳳音戲技猶赧赧當知愧孫登不獨嵇中散

步兵真曠達與世故浮游平時哭途窮鬱鬱宇宙幽浩
氣獨不揜築臺凌清秋一嘯已望我况乃爾汝儔斯人
固遺世世亦不汝收得非青白眼釣銖铢悟時流聊為招
魂些釋汝故時憂

言登阮公臺興來聊獨游因為爾時嘯景物故清幽奄

冉古今意淒瑟天地秋阿戎迷簿領况復五君儔

王實為監

倉不北眺度遐想遺音浩難收登臨感陳迹雲散惜風

流輒車此裴回何以慰百憂

乘流忽遇坎

鴈以馬病不行

觸焉邁茲游紆餘上雲壘禪房忽

通幽水光浮西澤草樹颯已秋豈無竹林友腰印不我

儔異時東山約興盡輒復收飛蓋想清夜華月湛西流

何當共巾履一笑破羣憂

我登步兵臺緬懷昔來游英聲入萬壑奇氣盤九幽轉
盼迹已陳況今仍千秋鸞鳳吟蘇門奚用愧彼儔堪笑
劉越石幸勝功遂收登高君能賦乃是子安流作詩已
可人洗我萬古憂

七夕

某觀晉漢以來七夕詩數百篇皆用俗
說某以為牛女之會不然故作此詩

七夕知何夕云是牛女期俚俗具爪華階除兒女嬉繁
星爛煌煌流月湛沉輝羣兒望鵲橋橋端七寶帷彷彿
想言笑薌澤疑煙霏人間光陰速天上日月遲隔歲等

旦暮會遇未應稀願言停笑驩察我心所祈我欲賜新
巧智術妙通微金針度綵縷寶奩卜蛛絲我嗟兒女愚
勤勞徒爾為巧拙天所賦乞憐真可嗤故拙不可厭吾
寧鈍如椎借云得新巧無乃醇愈漓吾觀天垂象列星
有攸司牽牛常服箱織女不下機牽牛教人巧積倉歲
無饑織女教人巧笥篋餘裳衣伊誰詢兒女組繡窮毫
釐年年渡河漢秋至次舍移宣淫五雲上此論乃吾欺
吾為牛女辨欲判千古疑

元祐六年夏自陽翟之睢陽迂翰林蘇公自杞
放舟至宋

放舟杞國岸汴渠正東注湯湯舟下水適與舟相遇泛
泛水上舟與水共東去舟水詎相離曾不遷故處世人
迷動靜順流疑若遡不然逐流浪汨沒為所誤吾作放
舟詩明此流水住老矣耄何為聊用持世故

石棧河在洪閘

犇騰龍嶠麓深壑斷如截石棧架寒溪盤陀卧精鐵從

衡布方楚片段髮文裂平如中唐甃罅密不容泄南巖
盡奇險萬狀森羅列或如巨獸蹲或類巴蛇嚙哀泉瀉
飛磴流沫常噴雪山骨靜無塵泓澄碧潭澈魚龍不敢
宅中有千古月壯哉天地間此險詎勞設乃知山水心
自欲為勝絕我陪勝士游茲名因不滅

足亭張康節南亭也臺數尺亭在其上

人生天地間海中一浮漚欲求無厭心無乃不勝求知
足有真樂不然多悔尤淺儒急名譽夸人矜智謀語默

偕螭蛄生死等蜉蝣不如知足者澹然樂忘憂袖手閒
萬變默坐觀九州衆舍吾獨存同波終異流君看至足
處無得亦無修萬物固皆備反照靡不周昧者彊務外
巧偽日嚮偷昔饑止願飽既飽思膳羞昔寒止願溫既
溫思狐裘非徒漫自苦動輒成贅疣相圃有足亭可見
好善優公孫皆秉哲克念踐先猷欲種豈弟德求異恩
澤侯秀嶺聳蒼玖寒溪搖翠鈎雲傳鄧林雨月送滄浪
秋曉暝竹煙暗午薰花氣浮涼颼泛南榮返照過東疇

所遇皆可樂觴詠友浮丘豈必朝玄圃弭節夕瀛洲永
懷樹亭意足焉此優游

鳴琴泉

此水自山石中來水石相激於暗竇琤琤有聲如琴故曰鳴琴今為道士深池

遂塞其竇水滿則不復鳴矣吁可笑也

昔聞流水操想見流水音况復山泉聲聲自如鳴琴可
笑山中人強作碧沼深暗流不復鳴遺聲杳莫尋近聞
石鐘山蘇辨正古今酈元與李渤地下當喋啗惜乎不
聞此使我徒登臨道人笑謂余胡不求琴心何勞絃上

聲況此非徽金

下第留別舍弟弼

繆承名卿後煜煜贊皇裔閔途邁伶俜勉力濟顛墜百
年能幾何三十已一世胷中經綸策偃蹇未獲試衰殘
蚤二毛坎軻窮五技探珠極溟海耻逢驪龍睡辛勤禹
門浪千仞復中躓吾道有用舍無乃天所否巖廊與溝
壑榮悴同一戲俱非本來物吾無窮途淚季父勉問學
弓冶付吾弟營營米鹽慮役役裘葛計雖服貧賤勞無

損剛大氣慎乃百勝術早拔萬夫萃老去重別離悲歌
感棠棣

下第留別陳至

明緡釣香餌彼取亦已微金丸徃抵颺我用一何卑余
生宇宙間動輒多願違天王十二閑玉勒黃金鞵奈何
驥與騾不使備六蜚鹽車初未脫伯樂第興悲寧甘生
芻餼不為場藿嘶京都足風埃士氣隨亦淄君於萬夫
間獨若三秀芝浩氣久已定得喪亮難移對之忘忿戾

澹然移安夷論交有斯人是用久敬之吾生三十年二十九年非末路各相望奮庸會有時貴如未可求守余北山薇

嵩陽書院詩

束髮從政事佩綬曳長裾守令有民社裂地皆分閭之爾何由必曰因業儒自致或世賞因儒升仕塗一朝希斗祿輒與故步殊佞夫專媚竈要路事馳驅俗夫抗塵容勾校迷墨朱自謂尚市道不若效賈區何必念故

業易地有蘧廬嵩陽敞儒宮遠自唐之盧章聖旌隱君
此地構宏居崇堂講遺文寶樓藏賜書賞田逾千畝負
笈昔雲趨勸農桑使者利心巧阿諛飛書檄大農鬻此
奉時須垣牆聚蓬蒿觀殿巢鳶鳥二紀無人迹荒榛誰
掃除桑羊固可烹縣令亦安乎令主尚仁政美利四海
敷仁賢任阿衡天地一朝蘇已責復蠲斂肉骨生膏腴
疲民悉按堵此地尚荒蕪淮西高夫子為政多美譽百
里政肅雍民不困追胥憤彼釋老子遺宮徧山隅吾儒

一何衰廢蹟可嗟吁連牋叩洛尹移文諷使車義有子
衿耻功將泮水俱興衰雖在天此意良可書却思鬻此
者於儒與何誅又思昔縣令亦昔儒之徒興儒有美意
無忘高大夫

史次仲錢子武與余在報恩寺納涼分題各以
姓為韻

天地怒氣散飢風若顛喜吹彼枳棘墟不入邃屋裏北
風何其涼雨雪雱不止卒歲無衣裘穴處猶凍死六月

如蒸炊執扇猶秉燬芄芄黍苗花吹落不結子老農悲
不獲飛鳥喜自恣雖難答天恩願天投木李

廬寓龍興仁王佛舍德麟公定道輔仲寶攜酒
肴納涼聯句十六韻

宿雨且初霽微涼吹廣庭嘉賓忽相遇方午夢驚扣扃

長松森翠影

德修

竹參青冥飄雲度空急仲殘日穿林

明幽牆隔江浦公遠嶼定風舩城市厭煩暑道山樊念

伶俜角巾代公紱

方草

具踰侯鯖園實摘的皪德厨醞

斟晶熒烹鮮縮頸大仲海錯著器腥笑談得真樂公採

櫨逢幽馨雲陰剝初霽道夕嵐收遠青窓卧憶元亮方

詩成懷景升日須河朔飲德當解高陽醒煩襟頓忘釋

仲嘉詠不少停闥闔發嚴鼓公穹碧垂繁星一笑跨鞍

去奚論楚人醒道

啄木鳥

小蟲蠹堅木自意叨頰剛蟠身宅幽竇心期千歲藏爾
非虎而翼何乃巧取將剝啄繞樹腹卷舌利鉤芒一身

禍衆命曾未厭飢
吭流怨入胡琴
美人借餘商鵲
鳩相唯和次第
歇芬芳吾生獨
何事有喙三尺
長富歲常苦
飢不能饜糟糠
寧飢忍効汝豈
復思隨陽

己卯春許昌湖上酬王實仲弓作

紫荷媚曲塘
青秧舞平畦
晨光沍晞
露衆木含華
滋咸驚物外
慕歸休及良時

封禪碑

魏公如管仲
封禪止文皇
侈心晚猶在
厥婦故敢猖
誣

彼七十君哀哉為民殃

文選樓

案此詩從宋
文鑑補載

申轅應楚聘鄒枚適梁苑藩侯喜賓客賢賢易鷹犬黃
綺遊漢廷羽翼增繳遠秦府十八公攀附名益顯昭明
衆才子文園俾蒐選高齋切浮雲雉堞俯晴巘尚應媿
河間筆削非大典

欽定四庫全書

集部

濟南集卷四

詳校官庶吉士臣汪彥博

侍讀臣孫球覆勘

膳錄監生臣董誠
膳錄貢生臣苗序濂

欽定四庫全書

濟南集卷三

宋 李廌 撰

七言古詩

汝州王學士射弓行

汝陽使君如孫武文章絕人喜軍旅要知談笑能治兵
戲教紅粧樂營女白氎新袍錦臂鞬條脫掛弓腰白羽
綵錯旌旗照地明傍花映柳陳部伍須臾觀者如堵牆
彷彿如臨矍相圃一人中的萬人呼絲管呶嘈間鉦鼓

臂弓上為使君壽遍及四筵樂具舉使君一笑萬眾喜
堂上酒行堂下舞錦段銀荷翠玉鈿意氣揚揚皆自許
儻令被甲執蛇矛恐可橫行擒贊普大勝吳宮申令嚴
兩隊宮娃啼且怖闔閭臺上呼罷休將軍雖賢亦猶鹵
豈知使君不忘戰聊以戎容娛罇俎夕陽卷旗去翩翩
使君要客登畫船美人不暇別粧洗戰士結束圍華筵
皆疑征南漢將帥樓船下瀨方凱還軍中不應有女子
偏裨校尉何其僂使君湖光照樓觀一碧不辨水與天

漸看暝色著疎柳已見白蘋浮暮煙銀漢斜橫北斗淡
明月碧玉疎星聯舟人罷唱時弄笛艇子趁魚行扣舷
隔浦熒熒見漁火意中竹籬青旆懸雖無荻花與楓葉
全似送客湓江孺亟令周娘作新曲周娘琵琶京洛傳
不惜千呼與萬喚便時轉軸仍撥絃馮夷陽侯或靜聽
穹龜大魚或後先且言白傅時落寞草草會遇仍嫣然
使君聞名滿臺閣虎符熊軾聊周旋風流樂事雖可記
皆過孫白二子前會看和戎竟先列鐵騎百萬臨三邊

報功女樂賜二八粉白黛綠皆嬋娟青雲乞身歸舊里
汾城故地依林泉琵琶亭中望汝海無忘飲中今八仙

題郭功甫詩卷

山人跨魚天上來識者珍重愚者猜或呼文舉異童子
林宗獨謂王佐材蚩蚩衆目如瞽矇白馬羽雪皆皚皚
古有仁賢不愚者舉足蹇路心徘徊桐城明府住姑孰
襟裾蕭灑天與才讒言屢改耻自雪政事報成羞援媒
臨川先生久知己十年執政居公台橫飛後生盡豪俊

徃徃扳越自草萊洪爐造化豈一端如何不與珽填坯
盛朝能詩可屈指少師僕射蘇與梅少師新為地下客
蘇梅骨化成塵灰金陵僕射今已老班班絲雪侵頤腮
當今儒生迂此道如使杞柳為椀杯好古愛詩惟有君
獨使筆力驚風雷清音繞齒嚼鳴玉爛光滿紙如瓊瑰
古原夜燒光奪月立使萬物有灰煤清泉漱石白鑿鑿
湍落急瀨成淵洄才雄句險駭人膽九月秋水灔瀨堆
有時清貞叩玄闕至誠直可歆郊禩公才穎粟公望異

牢落下位命何垂豈無白虹夜貫斗猶使寶劍豐城埋
幾年令尉困下國板簡青衫趨郡堦猶將富貴委脫轂
苟不知命安為懷竹溪逸人杜陵翁當年得意稱壯哉
直言時病傲宮禁謂可立致青雲階公行孰避蹲草虎
由徑不畏當路豺輸忠獻策恃才藻宰輔切齒全班排
遂離黼座謫千里翻疑方直為禍胎杳如躡雲上幽頂
文石嶮岼懸虛崖下視黑潭鰐魚窟山雨潤澤浮蒼苔
臨危喘喘懼石隕况更步滑粘青鞋上愬逢怒下見誚

愠望寧與羣小偕秋江接天夜如練桂宮隱見瓊瑤臺
泛舟夜披紫綺裘興發鼓枻傾金壘岸人疑是王子猷
美女擲揄言謔諧滄浪水深波浪濶醉謂止可探一柴
徜徉濯纓傲巨浸掬月不得翻委骸上皇雖悼屈平善
千載乃得為朋儕秋霜何草不玄黃蜀山成削青崔嵬
馬如蹇驢不慣遠陟險色變成厖隤閭道繁霜曉成漸
古壑暴雨飛陰霾散闕野哭夜悲怨倏見鬼燐明巖隈
長蛇食象留齒骨猛虎噬人餘釧釵故人招庇豈憚遠

軍謀宥密惟參陪春雨霖霖興槁苗膏潤不及枯根萎
正風寢熄雅頌廢吾言來自單于垓古今廢馬鉅為匹
驂騑駟駱駕與駉力良調俊惟騏驎李杜故得其梧魁
前輩攀轅讓馳道下石夾轂謙爭推二公當年走聲價
日月左運天旋回方今明時廢聲律將使湮淪如燼煨
非君鼓吹力主持是道不世將傾頽關西鄙夫懷此憤
白石空煉如女媧命違時否口常鈍如掛風鐸環堵齋
安得獻言彤庭下出入金馬如臯枚秉釣廟堂司慘舒

建旌立節如張裴

九齡說
休度

古云能詩多坎軻苟或信矣

良可哀儻使文章敵天下再使神禹驅秦淮

三月三日

柳眼脫殼花將飛麥梢弄黃青穗肥鵲鵲翩翩避舟去
燕泥悞落沾人衣樹外浮陽湖水綠漠漠不動含晴暉
沙暖浴鳬遺翠羽岸深老蚌吐明璣

黃河

昔我初為入秦客殘雪埋關閉長陌黃河二月凍初銷

萬里凌澌流劒戟西風細卷浪花催日射寒光明瑟瑟
歸時細雨正溟濛冷落關河已秋色驚沙慘慘塞雲黃
遠樹昏昏秋水白濟川壯志愈衰遲日送煙波問河伯

自陝州渡黃河歌

流浪滄浪二十年三江五湖一釣船江神海若諳忠信
此身常在蛟龍淵欲渡黃河濱小兒語相玩鯨鯢嗜人
正饕餮忠信難憑彼方悍我嘗夜泛子胥灣錢塘大浪
如銀山崇明海門水如墨況此相望一葦間為吾鼓櫂

為君歌氣凌河伯驚黿鼉醉披紫綺傲風波濟川遲暮
奈天何

上林道

憶昔驅車度函谷解鞍訪古驪山麓華清雖有亡國恨
繡嶺猶存舊時木無情草木競爭春不問興亡自紅綠
漢家上林更蕭瑟宮殿荒基走麋鹿可憐喬木亦已無
五柞長楊今樸樾

琴臺

廣陵散成不忍傳淵明援琴葛為絃乃知此樂潛聖賢
直與天地通其玄我兄能琴人所先我非知音知自然
或聞一曲山月前輕颺如坐春水船逆隨河源上青天
口膠不語生醴泉鼓舞和氣如陶埏至樂默默坐忘年

少華山

少華連延翠煙永細路緣雲上高頂奇峯西犇入秦蜀
幽谷南通接荆郢昔年蛟龍忽變化怒威山巔壓州境
山靈吐怪助豪彊地軸狂推如轉梗盤龍七社萬戶餘

卵覆巢傾伸臂猛近來又說神羊嶺六里橫開罅如井
居民喘喘已憂疑惟恐蛟龍怒還逞勿令岸谷復顛移
鼓鑄神功煩禹鼎

回心嶺

萬仞嵩峯接天遠妖武登封艱步輦初登峻嶺已回心
何事艱難能黽勉亦似嶽之泛剡溪想見王陽臨蜀坂
老子山林興不淺興盡中塗猶欲返古人戒在末路難
九十常為百里半世上風波更可憎心不可回聊自勸

次韻答張閣張閣見寄

我思佳人在何許太行之陽濟川上結茆賦詩臨清流
我情搖搖日西嚮盤谷秋來陰復晴谷口與誰來耦耕
賣刀買犢便能爾功名付之勃與平嗟余追逐老閭里
吟詩作賦不直水韋編鉉槩幸忘憂甘與牛衣同卧起
相從當及壯年時莫年多感定多悲此身安歸送歸客
豈堪登臨行路岐萬事紛紛戰蠻觸不須白眼憎時俗
但願如公無榮亦無辱臨流賦詩老亦足

田舍女

田家女兒不識羞
草花竹葉掉滿頭
紅眉紫襜青絹襖
領頸麤髹流黑油
日午擔禾上場曬
也喜年豐欲還債
傭工出力當一男
長大過笄不會拜
有者四十猶無家
東村定昏來送茶
翁嫗喫茶不肯嫁
今年種稻留踏車

蚩蚩

氓之蚩蚩不足數
四月五月濛濛雨
閉門縣榻二十年
不見孺子與文舉

趙令時德麟作襄陽從事丁丑季冬出行南山
三邑某同謝公定曾仲成潘仲寶携酒自大悲
寺登舟過峴山宿鹿門明日復自峴首目送緣
絕壁而往上船山下相與酌酒而去德麟賦詩
次韻和之

鄒湛葛疆往過此幕中佐曹畏簡書習池峴首自今古
故時悲喜成空虛越王之孫府從事惡人亦作俗吏呼
日從雲間二三子醉吟嘯傲相携扶王孫才高倦羈束

濕紙詎可包於菟興來鼓櫂碧江去把酒賦詩聊與娛
野人相逢荷傾蓋坐上作客慚食魚紅塵化衣對玉樹
白髮茁鬚如霜蕪飽聞襄陽好風土喜見山水相盤紆
久憐消髀厭羈旅便欲卜隱如林逋著書雖可自覆醬
志怪猶為鬼董狐茲游起我丘壑興豈復自為形迹拘
山中一屨可托足裘葛畧具便有餘結茆耒耜老巖谷
豈學少室隨駕盧老妻汲澗芼葵蕨丁男負芻仍掃除
諸公富貴或肯顧結駟野服來吾居

謝公定所寶蕃客入朝圖貞觀中閣立本所作
筆墨奇古許贈趙德麟而未予廌作此詩取以

送德麟

君不見燕然易水波桑乾東連鴨綠西賀蘭古來戰地
骨成土赤棘白草沙漫漫漢築朔方置上郡晚歲款塞
惟呼韓貞觀文皇力馴制諸蕃君長充王官玉門不闕
障無候驛道入參天可汗蠻夷邸中諸國使旃裘椎髻
游長安我恨不為典屬國望古遥集真可歎今觀此圖

寫職貢要荒種落蒙衣冠獸蹄鳥喙或鬼色想見膜拜
皆盤跚聖朝賢良謝夫子勁氣烈烈霜風寒目眇脣焦
萬卷爛筆頭成塚墨成灘南陽勸駕一封傳入對三道
朝金鑾萬言階對萬乘喜聲名一日青雲端行當遨遊
廟堂上坐令四國相交歡羽書不馳烽火冷鳴雞吠犬
何敢干僭令跳梁出巢穴當用斧斤摧髀髀戎亭喋血
無噍類藁街縣首如狐獾君當自畫凌煙閣縱有此圖
何必觀同僚華原貴公子求公此畫公無難乃知功名

丈夫志不惑玩好勞肺肝憐渠孜孜畫成癖心欲速得
如羽翰不如遣佐篋中品猶勝棄捐終不看

德麟自南邑至鄴相會作詩次其韻

脂車欲入南山路馬首忽西真有數此生兀兀老江山
曩事紛紛過風雨君行嶺上正穿雲我向津頭欲呼渡
石門秀絕冠荆楚萬壑千巖供指顧赴澗哀泉咽復流
出岫閒雲散還聚遙應寫懷遠憐我瘦馬饑童傍江霧
平時追隨若形影異縣相望忽如許他年兩翁各賦歸

思山便可拏舟去

千齡檜

岡頭老檜不記年古父約以千齡傳高枝凌兢倚北斗
低枝猶藏萬歲煙蟠根直與地爭固不許蚓穴通黃泉
陰森古恠神物附雨晦每見蛟龍騫賢哉樂天真逸者
手植蒼檜今宛然元和元豐五十紀婆娑下委纔及肩
信此千齡尚虛云幾見海變丘陵遷乃知不為斤斧夫
不在澗底與山巔

鼎足檜

巨根盤亘幾百尺高榦植立參天長蕭蕭氣清霜月白
雲根桂子飄秋香松陵高士風骨奇灑然臨流傲滄浪
油雲委地墨欲滴霾風拂雨炎天涼鬱留執策信秉鉞
軍中舞劍語激昂幽林俯見皆樸樾反視茂質獨蒼蒼
樂圃先生最珍玩如神偉象豈等常夢松蓋有三公兆
蒼檜鼎峙寧非祥

樛枝檜

檜今老矣何兢兢
樛枝下屈如不勝
左松右栢非爾朋
繁霜茂雪徒驕矜
鞠躬不敢騫其肱
午陰淒淒綠鬢髻
六月爽氣飛秋水
縈紆茂密羅附藤
猿猱臂絕愁難升
老龍銜雨將飛騰
矯首欲舉逢饑鵬

題王摩詰曲江春遊圖

咸雍山河互王霸
涇渭為隍城塹華
曲江臺沼備豫游
祇與畫師供入畫
長安城西山萬重
昆明烟浪繞新宮
新蒲細柳春風裏
萬戶千門佳氣中
我生不及開元時

猶喜此圖今見之蒼莽烟綃橫短幅眼中終南倒溪淥
傾城士女巷無人三月三時曲江曲老稚妍媸賤或貴
來者携壺歸者醉筆端造化有能事各肖人入樂遊意
如今此地空塵迹石鯨縱在如銅狄宜春五柞更蕭條
無復榛中得遺甕我願吾王明六符不蹈漢唐耳目娛
池籞假民任畋漁無令畫師為畫圖

王實沈兒歌

樂道觀
丈長子

昔聞吉夢占羆熊今見得子如阿戎先正舉世稱至忠

垂慶百世皆萬鍾山川秀氣久結融今復俾君生此雄
五侯七貂十八公當有八元為八龍愧我塵埃非太真
難使此兒名作溫勸君大作容駟門作詩聊代添金盆

盧泉之水次韻晁克民贈隱人

盧泉之水名何長裂臍不到空莽蒼讀君詩句心已涼
便覺滿耳清浪浪彼方逐臭如竊香肝膈鼠飽神鷹揚
有客飲水衣朝陽睥睨不語中何傷過從得君想更樂
直欲造化窮微茫何當相從老此水桀跖夷齊均是死

邊城四時曲送盛璋東玉之官平涼

邊城冬日日黃埃飛朔風
葱嶺雪深埋古道河岸冰厚
與天通可汗牙帳青海東
壯士卷甲趨奇功公孫卿材
名將種橫槊賦詩海濤湧
作吏宜思故家勇早取靈鹽
隸秦隴

詠齋詩

古昔詩客長風騷雲間野鶴鳴
九臯六丁極天十萬遭
攝提執策窮牛毛玄珠罔象誰能及
或長壯麗稱雄豪

九原殺氣橫天高朔風吹雪沾霜刀銜枚束甲夜渡洮
軍中壯士秉白旄愔愔怒不可拔一毫白狐幾腋成一袍
東溟一釣連六鼉二長不同各有勞吟咏至審公譏褒
詠齋之樂真陶陶君母獨樂愈自高亦當以手援兒曹

寄楊十三虞卿

前年君去時覆水坳堂中三年君不歸昨夜風雨驚破
屋不知生蛟龍壯士恥隱忍拔劍刺潰癰三杯然諾許
君死魚腹置匕首直入吳王宮扼鐔霍火飛吐氣成長

虹義名如鰲日英氣凌秋風

秦觀少章寄寂齋

臣門如市心如水漢宮解識尚書履形若槁木心死灰
東郭子綦初隱几明珠走盤丸走坂性不遷遷常止止
蚍蜉戰聲如雷霆渠自紛紛相我爾達人太觀觀萬有
區中狹隘真一睪磨堅涅白自古然不必飲牛憎洗耳
無渡河

無渡河無渡河中有龍門之雪浪天池之洪波上有碧

崖之岌業下有暗石之蹇蹇蛙蚓得志相譏訶况復龍
蜃與鼃鼃崇朝一舍即我郊黎民一葦平可過無渡河
無渡河招招舟子不足信彼亡維揖將柰何

自山中歸至登封遂諷高宰令取峻極中院厨
前石鐘板蓋唐人寺記字甚奇麗也

吳砧已碎樂生論京江昔沈瘞鶴銘半裁紫陽立砧石
考擊化度求金籙乃知金石有厄會名碑舊疊長安城
頃年醴泉有賢令政譽藹藹多流馨為憐文星足人傑

昔皆祔葬陪昭陵壞垣糞壤得顏碣榛立棘壠求魏徵
史訛遂正冲遠字石闕再樹六駿形板圖列籍示過客
龜趺螭首羅齊廷後來謬令類俗子輒去其籍人皆懲
昔到般舟訪遺跡季海寺記今彫零曉聞晨鐘呼僧粥
石磬嘹亮穿雲清往觀乃是唐短碣大窮索縛乘前楹
字形崢嶸筆蕭散遠過名殿諸題經勸僧拂拭置高壁
安知野僧不我聽十年再游尚如昔擊拊刻劃將俱平
急歸入城諷縣令立使舁至無久停此碑復立非我力

奇物久廢天須興

有懷都下寒食

上國茲晨每豫遊仙仗繚繞來瀛洲天王高御寶津樓
侍臣壁立環諸侯簫韶引風搖樹羽晴波飛影動宸旒
闌干仙人深霧縠樓前彩纜繫龍舟錦標霞舉奪日精
萬楫競渡馳蛟虬天顏一解四海春樂歲已忘凶年憂
況今持盈戒歆器不使逸豫常從流錦帆高張亦佳耳
清汴東注貫揚州

真君觀

嵩山勝地神仙宅真君獨作嵩山伯

潘師正謂門人曰陶弘景為嵩山伯

今百年矣扣帝求代帝令舉所知弘景舉余矣師正遂尸解而化

昔聞解職扣帝閣厭

此塵寰年已百天上百年一瞬間下土衮衮多腥羶勞

神應念日月走瞑目深哀膏火然潘公欲代復誰舉仙

籍題名今幾傳憶昔元豐己未遊僊泉猶作雨深湫十

年新事還堪笑廟貌今祠靈惠侯

真君泉今作廟泉矣道士利其祠禱也

經史閣

方城范貺富而善教子作經史閣以藏書諸
子皆有時名屬友人曾緯彥文求詩為作此篇
隱君扁舟離五湖初聞邑子驚陶朱多金不用五技術
高閣惟藏萬卷書牙籤玉軸比四庫縹帙錦囊過五車
河間闕遺應復購汲冢蠹簡嗟無餘碧山學士鮮傳業
黃卷古人相與居謝庭芝蘭信靈秀實家椿桂皆芬敷
朱欄翠瓦照空碧秋山晚林共扶疎寒溪送月出幽谷
白雲因風生坐隅道山三館限清禁山中此樂彼所無

異時聯華陟嚴近白虎東觀文石渠願待善本校中祕
毋令後儒爭魯魚

求茶戲丘公美

公美方自靈隱來面上灰土衣塵埃自言夜借僧榻眠
白日買酒不惜錢半月等得頭水茶欲求善價先還家
君不見邊孝先瞋睡晝多眠點茶追清興誠與真性便
聞君結交素奇偉朋友須求無逆意苟惠上品一斤來
庶全見利而思義

王彥溫多恕許惠葉縣石方尊將以貯酒作詩
取之

葉山堅石如水蒼斲為大尊重且方斟酌胡能問壘恥
獻酬不解隨觴揚勿言研材用非稱麴蘖文章皆伐性
請看毛穎不中書寧及時時一中聖月巖老子飲山村
但惜田家老瓦盆已剗匏瓜代杯飲願君持此比宸尊
相逢行

平生不為輕薄遊故亦未作相逢行尋常木彊畏犯義

直欲端彥規後生有客性不羈謂我何泥固太上立德
次立功癡兒乃為功名悞顏回窮凍終何成東山餓夫
適自苦君不見白楊依依北邙墓斷碣滅裂礙行路髑
髏物化今何為劍鉞雖存委為土癡兒胡為不早悟我
聞是言笑不顧樞衣布武出門去杳如乘鸞向煙霧精
神流離不自據想像髣髴若神遇果見姣姬拾翠羽穀
袂障日揚輕素芙蓉倒影碧波媚薄雲映日光未吐冶
容異公行聯娟美無度驚翩翩下烟渚游翔媚將高舉

為憐牽牛久獨處欲解明璫贈交甫臨行惠我不語意
定駕星輶為暮雨

崇福宮

崇福乃古太一所治今有太一殿存焉其後有太一泉今此宮頗摧毀

上都太一臨天街千乘萬騎頻往迴神崧太一古所治
曷日屬車游豫來昔年章聖奉玄寂離宮萬堵臨崔嵬
定陵弓劍隔重嶺金碧渝暗翬駕摧重門銅獸閉永日
靈園御坐生蒼苔達官乞開奉祠事肉食罔知真可咍
小臣作詩非望幸欲寫萬壑松風哀

壁間所掛山水圖

老驥無能空在閒
苜蓿既飽思行山
誰知八幅分向背
恍如百里隨躋攀
雲煙濛濛心共遠
草樹陰陰日將晚
一聲幽鳥隔前溪
萬古回春來疊嶂
涼風彷彿飛清霜
奉身九折思王陽
嗟我胡為不自愛
逐物顛倒輕餘光
瓜籬活計知何日
相對無言搔短髮
芒鞋竹杖請自在
皎皎吾身真匪石

聞角歎

晚角吟聲正悲嗟爾行道遲遲分中心有違女心憂傷
之人未歸臨岐滿掬淚輕埃變污泥壯夫安爾為日月
挂兩臆厲聲長嗟咨噫吁嘻季世無良臣禦戎無上策
輔桀盜貨財稽功數俘馘安知閼國步且要高官職勇
如漢將軍詭道作無益角本胡地樂相聞地遼邈漢家
豈無大呂與黃鐘豈無鼙鼓與鉦鐃且欲震軍聲安用
胡地角胡不嚴秋闕弓莫使胡人來莫使琵琶之聲過
河朔

作塞上射獵行

塞雲委地如潑墨惡風吹沙變黃黑紫髯將軍柳葉甲
銀駿護闌白玉勒鐵林子弟八九千飲馬渡橋過河北
沙漠默地古戰場寸草不生地皮赤將軍指呼令鼓輦
旌旆悠悠動堅壁壯夫露股挾纊溫蕃馬鞘脚寒有力
龜手荷戈指欲墜氣結冰凌滿須歷前驅蕭蕭近林翳
軍聲業業震金草恠狐跳梁罔兩避虎豹驚駭喪膽魄
山根淺草枯槎枒隱隱葉下見兔跡武夫張置四散逐

雙兔雌雄中金鏞自云舍矢不失馳手持雙兔有德色
凱旋如殪大兕歸喜非詭遇無所獲常聞武功貴時習
忘戰必危欲定國蒐田以時選車徒士卒素練務嚴翼
季冬物成農事休民間庶類亦蕃殖泮上虎臣獻俘馘
淮夷攸服遠人格悲夫王澤寢熄多鬼蜮蒙恬白起為
民賊君不見長平鬼哭萬人塚擊破秦坑髑髏白

贈卜者張生歌張歷陽人也

我憶扁舟昔南渡江心忽值蛟龍怒大浪崩騰舞我舟

尾脅蜿蜒東吾櫓怒聲如雷雷火烈腥風鼓天天如霧
我觀蛟龍等一戲衆面倉惶獨無怖平生忠信天自知
死葬江魚未應悞須臾水天碧鏡淨順風入帆風若御
歷陽古岸艤荒亭寒雲澹澹依江樹江南山水天下奇
更在江山奇險處朱門玉窻帶青嶂想見君家傍煙嶼
我今西來二十年夢寐江南見幽趣夫君何為抱奇術
輕去故鄉踏長路胸中秀氣未甘蟄欲繼君平齊季主
術高不肯等閑售惟喜遨遊卜卿輔爾來山郭坐空館

憐我困窮為推數閤人多矣君自信歸去來分余已悟
少年飛動已知非老來憂患寧堪顧壯時猶愧不如人
豈復衰殘彊馳騫儻來軒冕任去留縱有功名逼遲暮
箕山之陰潁水湄二頃荒田安畎畝曲肱飲水吾自樂
乘堅齒肥烏足慕吾生貧賤吾自知不解脅肩求貴富
我如富貴當蚤得已可通侯封萬戶惟有退身可自如
造物哀憐應不拒扁舟常繫屋南溪會當乘興江南去

胡為乎行贈丘公美

吁嗟憧憧之民兮何終身不靈耶不能揮毫縻青天耀
白日胡為乎布衣韋帶事讀書不能坐窮廬運籌算
胡為乎騎馬試劍輕其軀項籍耻作百夫勇禹行舜趣
猶賤儒億乎四支愁五臟不能成功竟何如胡為乎直
待臨老空嗟吁盍歸乎來盍歸乎來長橋繫白鯉擺尾
向天台風流李北海雄望摩九垓長卿向窮時尚為臨
邛吟北邙古墓空蒿萊胡為乎須上黃金臺

趙德麟中秋生日

中秋月風露淒清光倍潔皓氣澄霄萬象沉孤光散彩
繁星滅中秋潮江海鯨波此日高倒卷東溟蕩平陸逆
撼九江翻怒濤治平初年歲執徐越王國邸生英儒虎
腰燕頤巖電目鳳準犀顙冰雪膚九天月華為爽氣識
照古今窺聖秘胸中洞達不容塵瑩似太華無滓濺浙
江潮頭為駿聲名滿寓縣高崢嶸詞源落筆波濤動馮
夷陽侯皆震驚裕陵求人如不足蒐選羣材起巖谷網
羅英雄至四海晚獲天麟在王族除書令上芸香閣中

秘校讎專筆削辭榮寧作卿寺僚外遷肯入諸侯幕人
嗟官冷久淹回我知解養王佐才聖朝方欲相宗室黑
頭作公坐三台年年特班謝明主寶床禮物來傍午兩
軍戲伎候掖門馬首迎歸入公府我雖無能世或取尚
可與君為詔語

以古畫觀音易眉子石硯歌

疇昔翰林蘇謫仙溪藤寫贈眉石篇

先生頃于南京
嘗寫此篇贈廬

欲

尋此硯副此什婺源煙水空茫然君家寶硯多奇石一

一玄圭與蒼璧此硯初來衆硯疑
廁居末品真可惜寶林大士千億身
吾家古畫妙入神欲持吾畫易君硯
庶幾速證西來因我持君硯復何為
嵩山之陽潁水湄如藜咀藿坐蓬蓽
漱流枕石書新詩萬事推遷皆傳舍
世間孰是常存者畫硯伊余聊稅駕

冽泉亭詩

古井嵌空下如屋寒泉馥冽甘如飴
昔人傳是龍蜃窟睡未千歲人不疑
雲蒸每見飛蹙火沉縵或惹髣髯間
釐

安得海奴秉犀炬乘月夜照窺端倪

東湖詩

翠苻弄水時出沒紫萼浸滑涎蜿蜒川光遙接行潦前野
氣空濶浮寒烟常思郢客解刺舡豈解乘槎上青天又思吾兒
能測淵豈能奪得驪頰蟬上昇却回復入海只恐澄海為桑田

對春二首

半陰半晴惱亂我不禁春意惟殢春黃鶯丁寧舌初轉楊花
輕盈來弄人東家鞦韆多美女舞腰娉婷衣金縷彩索徘徊漸

漸高牆頭見人羞欲住柳下誰家薄媚郎立馬昂頭不肯去

一點兩點催花雨章臺走馬無塵土少年去老能幾時
買笑金錢不須數高陽酒徒多白髮長安佳妓今老嫗
共君把酒莫厭多作意彊作青春主文章放行多氣焰
筆畫把捉無精神願得神王如六通日寫萬卷酬青春

某頃元祐三年春禮部不第蒙東坡先生送之
以詩黃魯直諸公皆有和詩今年秋復下第將
歸耕潁川輒次前韻上呈編史內翰先生及乞

諸公一篇以榮林泉不勝幸甚

半生虛老太平日一日不知人不識鬢毛斑斑黑無幾
漸與布衣為一色平時功名衆所料數奇辜負師友責
世為長物窮且忍靜看諸公樹勛德欲持牛衣歸潁川
結廬抱耒箕隗前祇將殘齡學農圃試問瀛洲紫府仙
精思觀崔道士授劍栢中劍常吼若雷

陰陰老栢森庭牖外脫中空若虛在崔仙授劍栢遂神
劍氣騰天劍聲吼頃年天師受丹訣此地精思歲華久

玉函金匱發靈崖因使陰符誣虎口

張天師道陵得九丹之訣於崖下於

此地精思累年然後得之云

殿中真人道玄筆筆妙飛揚傳不朽霜

髮羽人逢白叟間歲已聞踰九九神游八極吾所願道

骨仙風愧無有欲賦大鵬思子微恐爾年齡亦為偶

梁觀

主八十

三歲

張居士歌

并序

張居士名拱字輔之誠信孝謹之士昔遇異人以

蒸棗七枚食之云餌此當終身不食拱始疑而

漫食之果絕粒二年行步輕捷神氣冲激拱云
欲不食則便可不食不問久近欲食則日可兼
壯者之食五人亦未嘗飫也拱善醫世家京師
龔章之甥龔夬之表兄也

凡夫冥冥不知曉却塵流浪如沙掃上天宮闕隔青雲
九原壟墓空秋草神仙有意憐下土獨取飈車出三島
張翁陋巷貧且賢簞餉瓢漿久懷寶羽客飛來自何所
蓬華相迎笑相勞高談妙理妙道本定是青牛度闢老

仙丹無形有真氣一視傳靈入凡棗聊分七棗遺張翁
一餌云充千歲飽張公不食今幾年齒如兒童顏色好
我聞神仙本無滓諸漏皆空體玄道姑射神人飲風露
淮南鷄犬依丹竈真詮自然本簡易不在勞形勤補腦
封山航海漫殫費葉衣草茹空枯槁况乃紛紛五濁世
粒食火化常熱惱余苦風塵衰太早綠髮蒼蒼半玄竅
青春堂堂暗中去常恐餘生似潢潦何當刀圭借殘齡
相與神游超八表

鍾山鐘

延平雙劍朝豐城鍾山之鐘挾以行延平春浪拂天地
左右兩龍雷火鳴建隆真人君八極河伯效珍寶鐘出
不似汾睢發鼎光泛泛逆流浮萬鑑詔賜閭闔濯龍宮
聲掩景陽聞九重吾聞此鐘亦神物獨肯寒溪就埋沒
舞陽令祝樂天再任

庚寅十月二十五曉分黑帝臨丹府怒來鞭掠玉麒麟
下降英靈佐明主廬江從此生奇賢便是奇人祝樂天

鼎沸絃歌一百里雙鳬舞水又三年部民共獻長生酒
鸞鶴莊椿只依舊我詠蟠桃別有春何須更祝人間壽

元祐六年夏自陽翟之睢陽迓翰林蘇公自杞
放舟至宋

發輟嵩麓背煙巖解維水程仍二三杞邦想見舊風烈
許邑自知誠子男天地憂懷真過計文獻不足良可慚
放舟適未覲君子白頭終期老江潭

擬楚詞并序

段文饒道充蒲城人也訪余於京師時道充將
歸隱於渭濱故作楚人之詞以勸其歸其詞曰

匠執斤兮道周稱百尋以弗用兮谷之幽屈輪囷以為
杯兮孰謂賢於杞柳揉吾性以矯真兮寧全天以為壽
樂吾樂兮樂不汝違樂不汝違兮盍歸乎來哉犀何尤
兮以角累象何咎兮齒為裁童牛天兮職駢剛而繭栗
龜告猶以灼兆兮寧泥中以曳尾珠綴旒兮悔夜光不
祥玉為圭瑞兮痛山輝之為殃樂吾樂兮樂不汝違樂

不汝違兮盍歸乎來哉蘭九畹兮芬薜芝三秀兮焜煌
山嵒嵒兮呈姿川溶溶兮搖光風騏騏兮歷楯雲續續
兮度梁葍為衣兮薜為裳椒為醴兮桂為漿樂吾樂兮
樂不汝違樂不汝違兮盍歸乎來哉

嗟美人詞

樞密直學士劉公希道久遷於外元祐天子
方欲大用於朝而公薨余心哀之故作嗟美
人詞以弔之

嗟美人兮何之撫千禩兮增悲咎司命之匪仁兮弗庇
下民故畱數於令人兮俾弗儼乎常期既閨端之引大
復柅止而繫維仰天衢而願騁兮羗為惠之罔終嗟美
人兮懷思闕靈修而自珍兮寧燕婉而倚巾彼鵲鳩之
早鳴兮欲衆芳之隕衰亮汝懷之匪良兮喜佳卉之具
腓靈芝遑恤汝以自芳兮亦三秀而呈姿候蟲呻吟而
競秋兮熠燿夕飛而流光蚊角翼而虎噬兮或負岳而
成雷俄歲運之徂征兮復爾齡之幾何彼大椿之先秋

今意松栢之後凋屬歲寒之太甚兮雪霜窘而煩威春
歸來兮暘谷溫條風發兮百卉非土泉閉兮崔嵬獨玄
黃兮就萎萎長年兮澗濱匠初顧兮弗辰感佳時兮嗟
美人蛻遺榮兮上賓天我顧天兮九閭如可贖兮百身

驪山歌

案此詩從宋
文鑑補載

君門如天深九重君王如帝坐法宮人生難處是安穩
何為來此驪山中複道連雲接金闕樓觀隱隱橫翠紅
林深谷暗迷八駿朝東暮西勞六龍六龍西幸我眉棧

悲風便入華清院霓裳蕭散羽衣空麋鹿來遊墟市變
我上朝元春半老滿地落花人不掃羯鼓樓高掛夕陽
長生殿古生青草可憐吳楚兩醢雞築臺未就已堪悲
長楊五柞漢幸免江都樓成隋自迷由來流連多喪德
宴安鴟毒因奢惑三風十愆古所戒不必驪山可亡國

觀吳正獻真

案此詩從宋
詩紀事補載

次公不許畫麒麟孝宣妙選知名臣拜公之像想風度
乃是雲臺子顏之文孫元豐天子建原廟玉宇萬棟臨

端門累朝名臣儼冠劍列聖御坐開乾坤修廊祕殿鎖
春色彷彿音容皆駿奔相君相業皆元元旂常彛鼎定
書勛儀形在歿侍神考英氣噩噩凝天閣嗣皇方思服
原闕美欲考辟公觀列文君傳茲圖落人世世人遂得知
瑜璫吾知袁公固有後能平楚獄竟無冤召公甘棠猶
不伐衛武之德誰能謏君不見溫公之像滿人間願廣
此圖令並傳

